

Kenn Zeit – kenn Zeit

Mongelwaar uff dere Welt
is die Zeit, nit nur es Geld.
Vunn iwwaall her heert ma heit:
„ich honn kenn Zeit, ich honn kenn Zeit.“

Mol willschde jemond um ebbes bidde,
do wird dei Satz unnerbroch in da Midde.
„Isch bin im Stress, ihr liewe Leit;
es duud ma Lääd, ich honn kenn Zeit.“

Heer nur mol rum unn spitz dei Ohr.
Heit honn se all schunn ebbes vor.
Vielleicht morje, nur nit heit,
isch honn kenn Zeit, isch honn kenn Zeit.

Beim Kaafe middem volle Wohn
stehn se hinna dir dann ohn.
„Ach wie gedd das longsam heit,
isch honn doch abselud kenn Zeit.“

Genau so isses aach im Bus,
weil der dauernd halle muss.
„Oh fahr doch weida, wo kenner innsteid,
mir honns eilisch, honn gar kenn Zeit.“

Ähna dräder uff de Fuß, hard wie e Geiß,
„Entschuldigung, ich weiß, ich weiß,
es tut mir wirklich schrecklich Leid.
Doch ich hab einfach keine Zeit.“

Gehn zwei uffem Troddoa, do heert ma e Schrei:
„Machen eisch eriwwa, lossen misch mol vorbei!
Brääd näwenonner laafe, ihr liewe Leit,
fa so ze spaziere honn isch kenn Zeit.“

Kriminell wird's, wemma im Audo sitzt,
als Beifahrer hämlisch Blut schunn schwitzt,
de Fahrer aussem Finschda schreit:
„Isch honn hie Vorfahrt unn iwwahaupt kenn Zeit!“

Los fahrder unn schunn isses passiert.
Sei Wääsch direkt uff de Friedhof fiert.
Uffem Grabstään steht donn groß geschrieb:
„Die Vorfahrt war sein.“ Unn sie issem geblieb.

Wenn jetzt de Herr do owwe sei Nome nennt,
willer nit heere, rennt weida unn mennt:
„Oh nää, isch bin noch nit bereit,
isch muss noch schaffe, isch honn noch kenn Zeit.“

Doch vorbei ist vorbei, verpasst ist verpasst.
Er wollte im Leben nicht Ruhe noch Rast.
Im Dod nun hat er unendlich viel Zeit,
von jetzt an bis in Ewigkeit.

